

Glenbert Croes ta informá: Noris van Lis Donata nombra como Vice Presidente di Parlamento di Aruba

ORANJESTAD - Den un informe mandá pa Prensa Partido OLA ta informá pueblo di Aruba di e hecho cu Sra. Noris van Lis Donata, Parlamentario di OLA, a keda nombrá como

Vice Presidente di Parlamento di Aruba.

Lider di OLA Glenbert Croes ta sumamente orguyoso cu e nombracion aki ya cu e ta un reconocimiento merecí pa Noris van Lis kende tin un trayectoria

impresionante den sector público. E primordial ta cu presidencia di Parlamento ta den man di dos bon hurista Arubiano Eddy Croes y Noris van Lis-Donata.

Ademas di e funcion di Vice

Presidente di Parlamento mr. Noris van Lis Donata a keda nombrá den diferente comisionnan fiho di Parlamento manera Comision Fiho di VROM. Ademas mr. Noris van Lis Donata ta presidí e Comision fiho di bienestar general, asuntunan familiar, di hubentud y salud público. E ta miembro di e Comision Financiero. E ta vice presidente di e comision encargá cu asuntunan estatal y di cooperacion entre Antiyas, Aruba y Hulanda. Alavez Sra. Van Lis ta miembro di e comision encargá cu Relacion cu Union Europeo.

Ademas di tur esaki tin diferente comision permanente di Parlamento Latinoamericano di cual Noris van Lis Donata ta miembro e.o. Comision di Salud y Comision di defensa di e consumidor.

E parlamentario mr. Noris van Lis Donata ta un persona conócí pa su diferente labornan desde cu e tabata Coordinador den Ministerio di Enseñanza den e promer Gobierno di Status Aparte. El a wordo nacionalmente reconócí pa e legisladora cu a percurá pa leyman di Chollery y Crèche keda acepta den Parlamento. Mas orguyoso aun, como reconocimiento pa e ser femenino, Noris ta e di dos Vice Presidente femenino di Parlamento di Aruba den historia di nos pais. Pues un reconocimiento merecí pa tur su gran labor na Aruba como na Hulanda como Director di Arubahuis y Minister Plenipotenciario suplente di Aruba na Hulanda. Deseo di tur clase di éxito na mr. Noris van Lis Donata.

Den un carta pa ASU y COA:

Minister Willem Vrolijk ta enfatizá riba un fusion entre ambos organizacion deportivo

ORANJESTAD - Minister Willem Vrolijk den un carta pa Aruba Sport Unie y Comité Olimpico Arubano a manda bisa integrantenan di e dos organizacionnan aki cu ta su deseo pa nan por continua den e esfuerzonan pa fusion di e dos asociacionnan deportivo aki keda realizá.


Ta opinion di e mandatario cu un fusion riba tereno di deporte lo ta den beneficio di Aruba cu lo conose desarroyonan deportivo nobo unda cu e hubentud lo goza di e frutonan cu e fusion aki lo trese cuné.

Ya ta desde Gobierno anterior cu a bin ta

trahando riba un fusion di e dos organizacionnan aki. Berdaderamente a cuminsa traha cu hopi entusiasmo riba esaki cual dado momento a terminá pa diverso motibonan.

E entusiasmo y deseo tabata di ambos banda y ta un lastima cu esaki no a culminá den un fusion. Pa purba facilitá esaki e mandatario den su carta a proponé na ASU y COA pa evaluá un otro acuerdo di cooperacion promer cu despues por culminá den un fusion.

Minister Willem Vrolijk awor ta den espera di nan respuesta.



The road to success is long,
but IBM Netfinity Servers
will get you there faster.



*Let Antraco Business Solutions
help you with your
business challenges.*



Available at:

ANTRACO ARUBA GROUP
BUSINESS SOLUTIONS

L.G. Smith Blvd. 126 P.O. BOX 598 Oranjestad Tel.: 823434 - Fax: 833006